

1527 dignitas, & incolumitas restitueretur; cum praesertim haud levis suspicio suborta esset, Hispanorum Duces, Pontificem captivum in Hispaniam mittere decrevisse, quo facilius pro libidine ditionibus Ecclesiae dominari possent. Itaque Urbinati exercitus imperatori, Pisano, ac Viturio legatis mandatur, ut quamprimum cum omnibus copiis Romam versus proficiscerentur, captivo Pontifici opem ferrent; ad arcem, qua detinebatur, iter aperirent; illumque custodia ereptum omni metu, ac periculo liberarent. Clemens licet inopinato tantae calamitatis eventu consternatus animo, & malorum ingentium mole pressus, ac fere obrutus nihil satis firmi consilii expedire posset; attamen statim ad Urbinatem Petrum Chiavellutium miserat, qui quo loco res essent, illi significaret, celerrimam opem peteret; ac Guidoni Rangonio eadem de re moeroris, ac lachrimarum plenas literas dederat. Imperator, & reliqui Duces, qui in Urbe Veteri exercitum habebant, castra movere, ac festinato itinere ad subsidium Pontifici ferendum contendere statuerunt. Ne vero a Caesareanis, qui in Insucribus erant, impediri ea res posset, Senatus decreto novi delectus habiti, ut milites, qui in Gallia Cisalpina Reipublicae militabant, ad decem millia augerentur, ut Antonio Levae obsistere possent, qui, nuper educto exercitu, novi aliquid moliturum praeseferebat; praesertim spe Germani subsidii fretus, quod cito Alpes transgressurum fama ferebatur. Ad haec ingens auri vis Adriatico mari Pisaurum, inde Romam versus ad exercitum, ad militum stipendia persolvenda, & copias augendas transmissa.

*Mandata
ad Urbina-
tem, &
exercitus
Legatos.*

*Petrus
Chiavellu-
tius Clemē-
tis legatus
ad Urbina-
tem.*

*Principum
incensi ani-
mi ad Pon-
tificem ca-
ptivitate li-
berandum.*

Et sane in hac rerum Italicarum iactatione spes quaedam bene gerendarum rerum affulgere videbatur; cum praecipue Pontificis Nuntius, Galliae, atque Angliae legati, & Franciscus Victorius reipublicae Florentinae orator, qui Venetos sua sponte ad opem Pontifici ferendam animatos adhortati fuerant, nihil suos Principes praetermissuros testarentur, ut a teterima Clementem servitute eriperent, atque Hispanorum turbidos, & insolescentes spiritus reprimerent. Franciscus quoque Galliarum Rex pollicebatur adversus Caesarem in Belgio arma moturum, ad eamque rem perficiendam Henricum Angliae Regem socium habiturum, cum quo nuper foedus